

- 1' Der würffet jnn die höh den ball
- 2' Vnd wartet nitt des widerfall
- 3' Wer will die lütt erzürnen all

Kap. 69



Bos dun vnd nit warten

- 1 Der ist eyn narr der andern düt
- 2 Das er von keym mag han für güt
- 3 Lüg yeder / was er andern tüg
- 4 Das jn do mit ouch wol benüg

5 Wie yeder vor dem wald jn bylth
 6 Des glich jm allzyt widerhylth
 7 Wer andere stossen will jnn sack
 8 Der wart ouch selbs des backen schlack /
 9 Wer vilen seitt / was yedem gbrist
 10 Der hört gar oft ouch wer er ist
 11 Wie Adonisedech hatt gton
 12 Vil andern / als wart jm der lon /
 13 Beryllus sang selb jn der kü
 14 Die er hett andern gerüstet zû /
 15 Des glich geschach ouch Busyris
 16 Diomedi vnd Phalaris /
 17 Mancher eym *andern* macht eyn loch
 18 Dar jn er selber fallet doch
 19 Eyn galg eym andern macht Aman
 20 Do er wart selbst gehencket an /
 21 Trüw yedem wol / lûg doch für dich
 22 Dann worlich / trüw ist misßlich
 23 Lûg vor / was hynder yedem stäck
 24 Wol trüwen / rytt vil pferd hyn wâgk /
 25 Nit yß mit eym nydischen man
 26 Noch wellst mit jm zû dische gan
 27 Dann er von stund an vberschlacht
 28 Das du nye hast jnn dir gedacht
 29 Er spricht zû dir / fründ ysß / vnd trinck
 30 Doch ist syn hertz an dir gantz linck
 31 Als ob er sprech / wol günd ichs dir
 32 Als hetts eyn dieb gestolen mir /
 33 Mancher der lacht dich an jn schertz
 34 Der dir doch heymlich âß din hertz

m ij

17 andern] ander *GW5046* 22 misßlich *GW5046 GW5047*] yetz myßlich *GW5041*